



PREZIDÉNSIA KONSELLU MINISTRUS

VI GOVERNUN KONSTITUSIONÁL

DÍLI, LORON 4 FULAN-ABRÍL TINAN 2017

KOMUNIKADU IMPRENSA

Sorumtuk Konsellu Ministrus nian iha loron 4 fulan-abríl tinan 2017

Konsellu Ministrus hala'o sorumtuk iha loron-tersa ne'e, iha Palásiu Governu, iha Dili, no aprova ona [proposta kona-ba Rezolusaun](#), ne'ebé apresenta husi Ministériu Finansas no atu haruka ba Parlamentu Nasionál, atubele **adere ba Akordu ne'ebé harii Banku Aziátiku Investimentu nian iha Infraestrutura sira**. Proposta ne'e mosu nu'udar kontinuasaun husi aseitasaun ba kandidatura Timor-Leste ba instituisaun finanseira internasionál ne'e no halo parte iha obrigasaun lubun ida ne'ebé país ne'e tenke halo tuir molok ofisializasaun adezaun nian.

Asinatura ba **protokolu kooperasaun nian iha infraestruturas obras públicas nian, urbanizmu no desenvolvimentu rejionál no urbanu, entre Ministériu Obras Públicas, Transportes no Komunikasoins Repúblika Demokrátika Timor-Leste nian no Ministériu Obras Públicas no Urbanizmu Repúblika Indonézia nian** hetan ona aprovasaun. Protokolu ne'e mai atualiza Memorandu Entendimentu ne'ebé asina ona iha tinan 2011 no 2015, iha área kooperasaun iha infraestruturas obras públicas nian.

Lihusi proposta Primeiru-Ministru nian, hetan ona aprovasaun **rejime remuneratóriu ba órgaun dirijente sira Konsellu Administrasaun Sentru Nasionál Chega nian!** ne'ebé determina valór sira iha relasaun ho remunerasaun no seña prezensa nian sira, tanba haree ba responsabilidade no sensibilidade matéria sira ne'ebé fó ona ba Sentru ne'e.

Ministru Obras Públicas, Transportes no Komunikasoins, ne'ebé akompaña husi Komisaun Nasionál Aprovizionamentu (husi Ministériu Planeamentu no Investimentu Estratéjiku), apresenta ona ba Konsellu Ministrus [rezultadu husi prosesu negosiasaun kona-ba operasaun no manutensaun sentráel elétrika sira Hera no Betanu nian](#).

Ministériu Finansas, hamutuk ho Diresaun-Jerál Tezouru nian, halo pontu situaun ida kona-ba **ezekusaun Orsamentu Jerál Estadu nian ba tinan 2017**, ne'ebé foka liu ba atividade prinsipál sira ne'ebé hala'o ona iha trimestre dahuluk tinan ida ne'e, ba rezumu husi dadus pagamentu sira tinan 2016



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608

no 2017 nian, iha avaliasaun ida kona-ba pagamentu hirak ne'ebé halo ona iha munisípiu sira no ba dezafiu prinsipál sira ne'ebé hasoru ona iha prosesu ezelesaun orsamentu nian.

Ministériu Administrasaun Estatál apresenta ona **kalendáriu operasaun sira resenseamentu eleitorál nian** ba atualizasaun kadernu eleitorál sira, haree ba eleisaun parlamentár tinan ida ne'e nian. Resenseamentu ne'e sei hala'o husi loron 8 fulan-abril to'o loron 26 fulan-maiu. Lista provizória eleitor sira nian sei fó-sai husi loron 29 fulan-maiu to'o loron 5 fulan-juñu, ba konsulta no korresaun. Lista final sira sei fó-sai iha loron 8 fulan-juñu iha Jornál Repúblika.

Komisaun Interministeriál ba aplikasaun [estratégia investimentu nian ba jestaun kona-ba fo'er sira ne'ebé isin sidade Dili nian](#), ne'ebé lidera hosi Ministériu Administrasaun Estatál, apresenta ona ba Konsellu Ministrus **proposta finansiamentu** ida ba asaun hirak ne'ebé mak envolve. Mosu sujestaun barbarak, ne'ebé sei hetan iha elaborasaun dokumentu ne'ebé sei hato'o ba Konsellu Ministrus ida oinmai. **REMATA**

